

## **Paurongo Garata Kpebung Yeneac Kibi Ohoec**

<sup>1</sup> Aposoro Pauro nearunac. Ngic yeneng uayoac yomoc mi nenggec nga ngic mongngo ifingoc ua yomocac sing mi mefigenenec, imoc kpac. Imoc Anutu Manggacngo, Kristo homecfunac megboriec, ye nga Yesu Kristo yereng sing imoc mefigenenocac ua yomoc mekecduae.

<sup>2</sup> Ni nga tosofocna nenahafoc kecdimbe, neneng Garata kpebung ngeneac kibi yomoc faingemmedimbe.

<sup>3</sup> Danggunuc nga ruae Manggacnina Anutu-arunac nga Kebunina Yesu Kristo yearunac nge-nearu febeso.

<sup>4</sup> Ye Mannina Anutuac negen negeng nga songoya modacma nenang kopocsicac amma yengena kekeha waec. Ifi amma naso mangana yofinenggac kecdimbe, imohacnac meicnunuec.

<sup>5</sup> Imocac amma yearu dedengerec wisic wisickea kpac fekengkecbeso, imoc fora.

<sup>6</sup> Anutungo Kristoac wosoefacfu ye modacgecdeac ngeni kpacngunuec. Amma ngeni ine ye bic yombong wama kengkecma siduc gombung siriha monggac kedzac faima modackecdae, imoc hembra wiac mangana yombong anu imocac negen negengua homac mema warecngunuduae.

<sup>7</sup> Amma siduc gombang siriha mong imoc mi fede. Ngic goango ine Kristoac siduc gombang-gac siriha netohogecdeac ayemmeu ngeneac uba mesufu angkecdae.

<sup>8</sup> Nga siduc gombang neneng bic edekpou angemmeing, imoc ine neneng me kurumen-nunac angero mongngo, imoc netohoma siriha mong edekpou angemmeudeu ye sowecyoacac bageu kecbeso.

<sup>9</sup> Nga yoac bic deing yoc monggoc deduae, ngeni siduc gombang bic negemma hoanggegeg, ngic mongngo imoc netohoma siriha mong edekpou angemmeudeu ye sowecyoacac bageu kecbeso.

<sup>10</sup> Anu ni yaguc yoac deduae, imoc ngic yeneng negen ngereenugecdeac mi deduae. Imoc Anutungo negen ngereenuudeac amma deduae. Amma ngic yeneng neac negenggeg ngereeuideac ua mebai dede Kristoac wanacngic naric mi kecbai.

<sup>11</sup> Tosofocna, siduc gombang dekperagianduae, negen negeng imoc ngic dedeunac kpac, imoc edengunubadeac negenduae.

<sup>12</sup> Ngic mongngo deu negenai me mongngo mi kpounenec, imoc kpac. Yesu Kristo yengenaoc imoc ine kpefinnu mekperagima kpounenec.

<sup>13</sup> Ni warac yudangic yeneac negen negeng arennu kecma faka anai, ngeni imoc bic negendae. Nga Anutuac kpebungfora efea mi yunukporac ayemmema memanganeyunuai.

<sup>14</sup> Nga yudangic neneac dedeseri nga fakau negen negennango yadikecma yudangicngac ogo-focna yeni homac feracyunuai. Amma esangabofocnina yeneac singyoac negemma herena gerec

dzeu imoc meserikefai.

<sup>15</sup> Nenggac heremanau tacbare Anutu yengenaoc meisinnuma wosoefahaac kpacnuec.

<sup>16</sup> Amma yeng songea modacma Medaha yengenaoc mewakenuu ni Medahaac siduc imoc bangec monnunac ngicngac Anutu mi negemmidae, yenearu dekperagibadeac ifi anec. Anu ni naso imohaingoc kemma dafi ambadeac ngic goa dekpesi mong mi ayemmeai.

<sup>17</sup> Amma ngic warainemma aposoro anggec yenembadeac Yerusarennu mi kenai, kpac. Ni ine Arabia bangecfu kemma monggoc Damasko dzigeneai.

<sup>18</sup> Ihai kecbare kifa harebec wisickemanu Kefa hembadeac Yerusarennu kemma uameme 15 yegoc kefai.\*

<sup>19</sup> Amma imohai kecma aposoro mong mi yeneai. Ni Kebuac munea Yakobosac henai.

<sup>20</sup> Yoac ohoduae imoc ikoc kpac, imoc Anutuac kicfu deduae.

<sup>21</sup> Anu imocac ngadeau Siria nga Kirikia prowinsiu kemma kefai.

<sup>22</sup> Nga Yudaia bangecfu Kristoac kpebung kecdae, yeneng ni mi negennugec.

<sup>23</sup> Goa yeneng yofi degec negenggec, “Ngic ye warac nunukporac anemmeec, ye negen negensinggac siduc gombung memanganeeconggo imoc yaguc ngicngac edekpou ayemmekecde.”

<sup>24</sup> Yeni ifi dema neac amma Anutu dengeregec.

## 2

<sup>1</sup> Anu kifa 14 wisickeu ni monggoc Yerusarennu

---

\* **1:18:** Kefa imoc Petoro. Yesungo kpara mong ifi mic.

kenai. Naso imohai Banabagoc neri Tito hes-ickedede nenahafoc kening.

<sup>2</sup> Ni Yerusarennu kembadeac Anutungo kpefinnu edenuec. Ihai kemma siduc gombung bangec monnunac ngicngac Anutu mi negemmigec, yenearu sing edekpou ayemmekefai siduc imoc ngic enara degec kegec, yeni tembuc tembuc dekperagiyemmeai. Ni warac nedziai nga yaguc nedziduaengoc, uana imocngo sicsauc amma fora kpac ambacac yoac imoc dekperagiyemmeai.\*

<sup>3</sup> Anu Tito griknigicngo nigoc haec, ye sebi tosea herecgegedeac enara yeneng mong mi degec.

<sup>4</sup> Ngic goa tosofocnina mi andae, yeneng ine Titoac ifi degec. Yeni sing eseaac bageu fainunugecdeac hama botucninau kecma Kristongo witicfunac menunuec, imocac kikitong kecdae.

<sup>5</sup> Nga siduc gombungac yoac fora ngenearu seria feudeac neneng naso monggac ngic ifia yeneac yoac bageau mong mi kefing, kpac.

<sup>6</sup> Anu ua mekecduae dema ngic enara yeneng imohai wiac mong torokpema ambadeac mi edenugec, kpac. Nga yeneng warac dafi kegec, imoc naric mi debade. Anutungo ngic sebiacsac hemma ngicngac mi isingyunuude.

<sup>7</sup> Yeneng ine faka fora yofia hemma mariu meme anggec. Anutungo Petoro ngic sebi tosangina herec herecgea yenearu siduc gombung dekperagiudeac uayoac miec, ifi isocngoc ni ngic sebi tosangina mi herec herecgea,

---

\* **2:2:** Paurongo yoac heima nedzi nedziac yoac homac dede.

yenearu siduc gombang dekperagibadeac uayoac nenec.

<sup>8</sup> Anutungo Petoro ua kucgoc meudeac fenggemi, yeng ngic sebi tosingina herec herecgea, yeneac botucfu aposoro ua meec. Nga ni ifi isocngoc ua kucgoc mebadeac fenggenenu bangec monnunac ngicngac Anutu mi negemmidae, yeneac botucfu aposoro ua mekecduae.

<sup>9</sup> Anu kpebunggac ngic wotunga degec, Yakobo nga Kefa amma Yohane, yeni Anutuac danggunuc fenec, imoc hentegecma yeni ni nga Banaba nerigoc uba mocgu amma marinira mema yofi degec, “Ngeri bangec monnunac ngicngac Anutu mi negemmidae, yenearu siduc gombang dekperagibesera nga neneng ngic sebi tosingina herec herecgea, yenearu siduc gombang dekperaginide.”

<sup>10</sup> Ifi dema yoac mocgusac yofi torokpegec, “Ngeni ngicngac makpekpea, yeneac ebic negensibisia.” ifi degecac ni imocnoc negemma mamangkima ua serima mekefai.

<sup>11</sup> Anu Petorongo Antiokia hama sing segeec. Imocac amma ni namma kopocsic anec, imoc edeai.

<sup>12</sup> Yakoboarunac areng goa mi hamagec ye bangec monnunac ngicngac yenigoc yaka nekefec. Nga ngic sebi tosingina herec herecgea arengfora goa hasikegec, imohai ye kengec amma bangec monnunac ngic wayunuma yenigoc monggoc mi tarec.

<sup>13</sup> Ifi anu yudangic tosea yeni ifingoc yegoc sevimeme anggec. Nga Banabango ifingoc ikoc

fakangina modacma sing segeec.

<sup>14</sup> Anu yenemba, yeni siduc gombunggac yoaac foraac faka mi modacgec, ni ngicngac sasawa yeneac kicfu Petoro yofi edeai, “Ge yudangicnoc amma yudangic fakanina wama bangec monnunac ngicngac, yeneac faka modacannec, ge ine bangec monnunac ngic, yeneng yuda neneac faka modacgecdeac fakagau edzacyununec, imoc mi ngereede.”

<sup>15</sup> Neni yuda arennunac fingering nga bangec monnunac ngicngac Anutu mi negemmidae, kopocsicmeme areng yenearunac mi fingering.

<sup>16</sup> Ngic mong ye Yesu Kristo negensinggedeu Anutungo yeac ngic dindingac demiude, imoc negendimbe. Ngic mong ye dedeseriyoac modacma kecde, Anutungo ye dindingac mi demiude, kpac. Nga Anutungo negen negensinninaac amma dindingac denemmeudeac neni dedeseriyoacac sing wama Yesu negensinggema kecdimbe. Imoc yofiac, ngicngac dedeseriyoac modacandae, Anutungo yeni ngicngac dindingac naric mi deyemmeude, kpac. Ye ngicngac Yesu negensinggema kecdae, yeni ine dindingac deyemmeude.

<sup>17</sup> Goa yeni neneac yofi dedae, “Ngeni dedeseriyoac wama kopocsic meficgedae.” Ifi febac dede Kristongo kopocsicac sing meficgengemmebac nga ifi kpac.

<sup>18</sup> Ni wiac bic wama meickeai, imocac tataha monggoc mengerebadeu kopocsic meficgebai. Nga ni ine faka esaac tatak monggoc mi mengerebade, kpac.

<sup>19</sup> Ni Kristogoc mariponnu momoc nugec nanic. Nga Anutugoc kecbadeac amma dedeseriyoacngo kopocsicna edzacnuu Kristogoc homema yoac imoc wayai.

<sup>20</sup> Imocac amma ni neannaoc monggoc mi kecduae. Kristongo neac ubaheremanau kecde. Imocac yofinenggac kecma Anutuac Medac negensingeba yeng kekecnau mewakenude. Yennoc heresongogoc hoannuma neac amma yengena kekeha waec.

<sup>21</sup> Anutuac wosoefac ubanango mi wadae. Ngic mong ye dedeseriyoac modacande, Anutungo ye ngic dindingac imoc naric mi demiude, kpac. Imocac amma Yesungo mariponnu homeec. Dedeseriyoac kuhagoc febac Yesungo mariponnu naric mi homebac.

### 3

<sup>1</sup> Garata ngic, ngeni negen negentegecngina kpac yombong. Yesu Kristo mariponnu kpegec nanec, ngeni imoc negentegecgecdeac kicnginau yoac soha kpoungemmeing. Nga ngic mongngo ine kundunggac faka mong angemema negen negengngina mesufuu ngeni ifi isoc kecdae.

<sup>2</sup> Ngeni yofi isinggebisia, neni siduc gombang edengununi ngeni imoc negensinggema Asu megecnoc. Ngeni ine angammemenginango dedeseriyoac modacgecac amma Asu mi megec, kpac.

<sup>3</sup> Ngeni Asugoc kekecngina hanahegecngo yaguc ine uba eseaac uau monggoc kecdae, imoc mi ngereede. Ngeni kapafaka yombong andae.

<sup>4</sup> Ngeni warac Yesuac amma kpendzengtoa kpegec. Nga yaguc ine imocac fora engsac wadae.

<sup>5</sup> Ngeni Abrahang isoc Anutuac yovac negemma negensinggegecac Asungo hama kucfakaya botucnginau mekecde. Nga faka imoc dedeseriyoac mekecdaeac amma mi fingece.

<sup>6</sup> Imoc yofi fingerec,

Abrahang ye Anutu negensinggeu Anutungo ye ngic dindingac demiec. (*Fingec fingec 15:6*)

<sup>7</sup> Imocac amma ngicngac Anutu negensinggema kecdimbe, nenang Abarahanggac medacfora, ngeni imoc negentegechisia.

<sup>8</sup> Nga Anutungo bangec monnunac ngicngac, yeni negen negensingnginaac amma dindingac deyemmeude. Ye imocac siduc gombung warac Abarahang edeec nga imoc mitikibiu yofi oho ohoya fede,

“Bangec monnunac ngicngac, yeni sasawango gearu hama kenecgoc anggecde.” (*Fingec fingec 12:3; 18:18; 22:18*)

<sup>9</sup> Abrahangngoc Anutuac yovac negensinggeec nga ngicngac yeneng Anutuac yovac negensinggedae, yeni Abrahanggoc kenec megecde.

<sup>10</sup> Ngicngac yeneng dedeseriyoac tobanggema tofohokecdae, yeni sasawango sowecac bageu kecdae. Mitikibiu imocac yovac mong yofi oho ohoya fede,

“Ngcngac dedeseriyoacfu wiac oho ohoya fede, imoc wama mi modackecdae, yeni sowecac bageu kecdae.” (*Dedeseri 27:26*)

<sup>11</sup> Mitikibingo ifingoc yofi dede,



“Ngc mong ye negen negensing arennu kefude,  
Anutungo ye ngic dindingac demiude.”  
(*Habakuc 2:4*)

Nga mong ye dedeseriyoac modackecde, Anutungo yeac dindingac mi demiude, kpac.

<sup>12</sup> Dedeseriyoacngo negen negensinggac yoac mi mekperagiude. Nga yoac mong yofi ine dedea,

“Ngc mong ye yoac imoc modacma kecde, yeng imocac manau kefude.” (*Sesememe 18:5*)

<sup>13</sup> Yesungo donina mema dedeseriyoacac sowecfunac bummenunuec. Nga yoac yofi oho ohoya fede,

“Ngc sasawa icfu gbedicyunugec nanggec, yeni sowecnginagoc.” (*Dedeseri 21:23*)

Ifi feecac dedeseriyoacac sowecngo Kristo sendenggeu yeng dedeseriyoacac sowecfunac menunuec.

<sup>14</sup> Anutungo kenec Abrahang miec, imocngo Yesuac amma bangec monnunac ngicngac, yenearu kendarudeac Yesungo bummenunuec. Ifi anu Anutungo yoac deseriec, imoc modaru nenang Yesu negensinggeni Asu nemmeec.

<sup>15</sup> Tosofocna, ni ngic fakanina fede imocac sirihauec edengunuba negenggec. Ngic mongngo maridzominggac yoac deserima deu ngic mongngo imoc naric mi kpeude nga yoac mong imocac witiau mi torokpeude.

<sup>16</sup> Anutungo Abrahang nga bangeha yeri wiac goa yemerudeac yoac dedzege anec, imoc ye bangecfora homac yeneac mi deec. Ye ine ngic mocguacsac yofi deec, “bangecga.” Nga ngic imocnoc Kristo. (*Fingec fingec 12:7; 13:15; 24:7*)

17 Ni imocac amma yofi deduae, Anutungo Abrahanggoc dzadzahac deseriec nga kecma kifa 430 wisickemanu Mosegoc dedeseriyoac fingerec, imocngo dzadzahac esea naric mi kpeude me me-ickeude.

18 Manggac mongngo maridzominggac yoac mong mi deude isoc nambaracfora yeni dedeseriyoacac sing modacma maridzomingg-ina megecde. Nga Anutungo Abrahang wiac miec imocngo maridzominggac yoac modarec.

19 Ifi anudeu dedeseriyoac nocac faifaia fede? Imoc yoackpekpeac amma faifaia fede. Abrahanggac bangeha ye mi fingecmanu Moseac dedeseriyoacngo kuhagoc feec. Bangeha yeacnoc maridzominggac yoac oho ohoya feec.

Anu angero yeneng ine dedeseriyoac mema uba mocgu fingerudeac hengising ngicngina Mose migece.

20 Hengising ngic ye ine areng mocguac yoac mi deude. Nga Anutu ye mocgu amma yengena yoacacsac deude.\*

21 Anutungo Abrahanggoc yoac dzegeec, imoc dedeseriyoacngo mi kpede, imoc kpac yombong. Anutungo dedeseriyoac nemmeec, imocngo kekecseri meficgenemmebac dede ye dedeseriyoacac amma ngicngac dindingac denemmebac, amma ifi mi fingerec.

22 Ngicngac Yesu Kristo negensinggema Abrahanggac dedzegeyoac hoanggekecdae, yeni maridzominggina megecde. Imoc fingerudeac

---

\* **3:20:** Imocac amma yoac dedzege Anutungo Abrahanggoc meec imocngo Moseac yoac ferahede.

mitikibingo ngicngac sasawa kopocsicac bageu faiyunuec.

<sup>23</sup> Negen negensingngo mi femanu neni witica-mau tacni, dedeseriyoacngo garennunuec. Nga negen negensingngo fingeru ebic imoc kpac anec.

<sup>24</sup> Nga dedeseriyoacngo garennunuu kecminangoc Anutungo negen negensinnu dindingac denemmeudeac Kristongo fingerec.

<sup>25</sup> Nga naso yomoc negen negensinggac sing dindingac kekec bic fingerec. Imocac amma dedeseri garenggac bageu monggoc mi kecdimbe.

<sup>26</sup> Ngeni sasawango negen negensinnu Yesu Kristogoc kpeketahema kecma Anutuac medacfora andae.

<sup>27</sup> Nga ngicngac Kristoaru doku nadzicgec, ngeni sasawa siricngina yofi, Kristongo wambangina anu ngeni ye heigec kemeec.

<sup>28</sup> Imoc yudangic me grikngec me wanacngic minginagoc me ngic witiha kpac, ngic me ngac, ngeni areng mong mong mi andae, ngeni sasawango Yesu Kristoaru kpeketahema areng mocgu andae.

<sup>29</sup> Nga Kristogoc kpeketahedaeu Abrahanggac bangecfora kecma Anutuac yoc dedzegegoc kpeturanggema maridzominggac areng Kristogoc anggecde.

## 4

<sup>1</sup> Ni yofi negemma deduae, medac mongngo maridzominga yeac anudeac negemma medacbisic amma imocac tomai kecde, ye kpara kpac kecma wanacngic isoc kefude.

<sup>2</sup> Ye yengena garenggac bageu amma hiedzo garenggac bageu kecmanungoc mamango naso deec, imoc hasikeu finaha tiu enude.

<sup>3</sup> Nenang ifingoc ifi kefing. Nambarac kecminangoc bangecac hadehade yeneng wanac menunugec yeneac bageu kefing.

<sup>4</sup> Kecmina naso dedea, imoc hasikeu Anutungo yengena Medaha sueu maec. Ye dedeseriyoacac bageu ngacfu fingerec.

<sup>5</sup> Fingecma ngicngac dedeseriyoac bageu kecdimbe, nenang ihacnac yungecnunuu erema yengena medahaac tatic menideac maec.

<sup>6</sup> Ngeni nambaracfora andae, imocac amma Anutungo Medahaac Asu sueu hereninau kecma yofi kiackecde, "Manggac, neac Manna."

<sup>7</sup> Imocac amma, ge monggoc wanacngic mi anade. Ge Anutuac medactatic mena yeng maridzomingga dedea, imoc genude.

<sup>8</sup> Anu ngeni warac Anutu mi negenggec nemu yeneng wanac mengunugec. Amma nemu imoc yeni Anutuac sirc isoc kpac.

<sup>9</sup> Ngeni yofinenggac ireckema Anutu negemmi-dae me yofi naric deba, Anutungo ngeni bic negengngunuu kecdae. Nga ngeni monggoc dzigenema bangecac hadehade makpekpea nga kucngina kpac, yenearu monggoc kemma yeneac wanac areng anggecdeac negendae, fakangina imocngo obohode.

<sup>10</sup> Amma ngeni uameme goa nga afo goa nga kpefinnu naso hemma kifaac siriha naso hania haniaac negenggec fora anu imoc modacma ke-candae.

<sup>11</sup> Nga uatoa ngenearu meai, imocngo fora kpac ambacac amma negengyohoc anduae.

<sup>12</sup> Tosofocna, ni ngeni isoc kecduae, imocac ngeni ni isoc anggecdeac desambic amma eden-gunuduae. Nga ngeneng mong mi memanganenugec.

<sup>13</sup> Sebiugeng ebicnagoc amma naso imohai hanahema siduc gombang dekperagingemmeai, imoc bic negendae.

<sup>14</sup> Nga sebinaac ebicngo ngeni tobangngunuec, fora nga ngeneng mi negemmanugec amma mi wanugec, kpac. Ngeni Anutuac angero mong me Yesu Kristongo haec, ifi garenggebau isoc ni hoanuma garennugec.

<sup>15</sup> Anu yaguc ine songongina engsac kpac ande. Ngeni warac songo homac negemma kicgbomangina mesima nenggecdeac siriha anggec, ngenec gombang imoc hepuc amma dekperagiduae.

<sup>16</sup> Ni goroyoac edengunuba ngeni neac yoac wagec, imocac obohoduae.

<sup>17</sup> Ngic wangepngunubeso angkecdae, yeneng ngeni yenigoc torokpema nanggecdeac gereagoc yombong dekecdae. Amma yeni ngeneac gombangua mong mi negensidae, kpac. Ngeneng yoacnginaac songo negemma yenearu torokpegecde, imocac ine ayemmede.

<sup>18</sup> Ni ngenigoc kefai, imohai faka gombangua modacgecdeac uatoa megec. Amma faka gombangua modacgecde, uatoa imocac nasosoc mekecbisia.

<sup>19</sup> Nambaracfocna, ni ngeneac amma monggoc kpendzeng gadze isoc nikecde, ifi angkecbare Kristongo ngeneac hereu fingectegecbeso.

<sup>20</sup> Ni ngeneac negemma dafi ambade, imoc obohoyombonggema negen negeng ua mekecd-uae. Amma ngenigoc yofinenggac kecbai dede goroyoacna seria naric wama yoac yumea deba ngeni imoc modacbau.

<sup>21</sup> Anu dedeseriyoacac bageu kecbeso angemmedeu, ngeni kedzac faima yoac yomoc negembisia,

<sup>22</sup> Abarahang ye medahora yohockang, mitik-ibiu yoac ifi oho ohoya fede, medac monggo enema yombong, yearunac nga mong ine wanacngac yearunac.

<sup>23</sup> Nga medaha wanacngac yearunac, ye sebiac arennu fingerec nga enemaarunac yombong fingerec, yeng Anutuac dedzegeyoac feec, imocac arennu fingerec.

<sup>24</sup> Ni yoac heima yofi deduae. Ngac yohockang yeri dzadzahac yohockanggac onga andape. Dzadzahac mong imoc Sinai tikiu Arabia bangecfu yoac dedzege anggec, imocac nambaracfora yeni wanac kekecac bageu fingeckecdae, imocngo Haga ande.

<sup>25</sup> Amma Yerusareng imoc Hagaac ongea ande. Yerusareng ye yaguc yengena nambaracforagoc wanac areng amma witicfu keckdae.

<sup>26</sup> Nga wi kurumennu Yerusareng mong witiha kpac, imoc nenang nonggonina yombong.

<sup>27</sup> Nga yoac yofi oho ohoya fede,

“Ngac kufing sabacga kpac, ge sogac sogaigoc kecna. Nga ngac gadze mong mi giec, ge kucgoc sogaima arohona. Ngac kosic yeac nambaracfora homac, kpetenginango

ngac eweagoc yeac nambaracfora kpeteng-  
ina feraheude.” *(Yesaia*  
*54:1)*

<sup>28</sup> Tosofocna, Anutungo Abrahagoc yeac dedzege anu Isaka fingerec, ifi isocngoc Anutungo Yesuac amma yeac dedzege meficgeu yengena nambaracfora fingering.

<sup>29</sup> Ngic sebiac arenunac fingerec, yeng naso imohai ngic Asuac arenunac fingerec, ye kpekporac ammiac, siric imocngo yaguc fede.

<sup>30</sup> Nga mitikibingo imocac negensima yofi dede, “Ge wanacngac medahagoc kporacyuruna kenec, nocac wanacngac yeac medahango enengyombonga yeac medacgoc maridzoming naric mi meecde, kpac.” *(Fingec fingec 21:10)*

<sup>31</sup> Tosofocna, imocac nenang wanacngac yearunac kpac, nenang ngac enema yombonga yearunac.

## 5

<sup>1</sup> Nenang witiha kpac kecnideac Kristongo witicfunac yungecnunuec, imocac ngeni serima nambisia. Ngeni monggoc wanac kekecac bageu faingunubauac henghomema kecbisia.

<sup>2</sup> Negendae, ngeni sebi tosangina herecgegedeu Kristoaronac memefic mong mi megedce, ni Paurongo imoc edengunuduae.

<sup>3</sup> Ngic sebi tosangina herecgegedeu yeni dedeseriyoac hafoangoc tofohoma modacdabisia, imoc serima monggoc edengunuduae.

4 Nga ngic Anutuac kicfu dindiangac nanggecdeac dedeseriyoac modacgecdeac negendae, ngeni Kristoarunac kperecgeemema yegoc monggoc mi kpeketahama Anutuac wosoefac wama ngadeau kecgecde.

5 Nga Asungo wangecnunuu neni negen negensinnu kecni Anutungo dindiangac kpacnunuude, imoc menideac tomai kecdimbe.

6 Nenang Yesu Kristoaru kpeketahama kecnideu sebi tosea herec herecgea me mi herec herecgea, imocngo wiac engena mi ande. Negen negensinninango heresongogoc hoangemema mekecnide, imocngo fora ande.

7 Amma ngeni mitiac sinnu nedzi nedzi gombunga nedzimagec ngic merang singngina hedzickeu yoc fora wama kecdae.

8 Anutungo kpacngunuec amma yeng faka ifia anggecdeac mi fenggengunuec, kpac.

9 Yis kapiancnggo uuha sasawa sokodarude.

10 Nga Kebugoc kpeketahema ngenec negemma yofi negensima kecduae, ngeni neac negen negeng imoc modacma kecma negen negeng goa wagecde. Nga ngic mong ye negengyohoc meficgengemmekecde, yeng kopocsicac turunga meficgeude.

11 Tosofocna, sebi tosa herec herecgea sing imoc mi dekperagiduae, sing imoc bic wayai. Imocac amma ngic yeni nukporac anengkecdae. Ngic yeni sebi tosangina herecgegecdeac kpouyem-mebai dede ngicngac yeni mariponggac yoacac ngaba mi ambau.

12 Nga ngic goango yoacnina kpekecma negen



negengngina mesufuma kecdae, yeni sebi tosangina hafoangoc herecgema meickegec ngeree bac.

<sup>13</sup> Tosofocna, ngeni witicngina kpac kecgedecac Anutungo kpacngunuec. Ngeni witicngina kpacac amma ine degbedic yoac dema uba esea modacgec mi ngereeude. Imoc mi fingerudeac ngeni songogoc hoangemekecma wanacngic isoc kingang kpeemebisia.

<sup>14</sup> Imoc yofiac, dedeseriyoacngo hafoangoc kpeturanggema yofi fede,

“Ge geangga anggengande, siriha imocngoc ngicngac ogofocga heresongogoc hoangyunukecbesena.” (*Sesememe 19:18*)

<sup>15</sup> Nga ngeni ine ngenaocngoc enacngo ingiemema ewekpebuc angemekecma memanganeembauac garengngina meemebisia.

<sup>16</sup> Ni yofi deduae, ngeni Tiri Asugoc heirima kengkecbisia. Amma ngeni uba eseaac negensongo wama imoc mi modacbisia.

<sup>17</sup> Uba eseaango Asuac kecec kpeude nga Asungo uba eseaac kecec kpeude. Yeri ngaba angemean-dape, imocac ngeni wiac gombunga ambesonga negengkecdae, imoc waandae.

<sup>18</sup> Nga Asungo wangepngunuu kengkecdaeu dedeseriyoacac bageu mi kecgedec.

<sup>19</sup> Nga uba eseaac angammeme didiu yofi fin-gectegerude, Kaisero faka nga sebiac songo hania hania.

<sup>20</sup> Nemuac eweheihei kecec nga dzinac faka amma ngabagoc tohoeme kecec, ngeni yoacngina ngabasiric angandae nga kichodung nga herebu amma tusucnene faka, gurunegicgoc tohoeme kecec amma mitiareng ikoha hania hania.

<sup>21</sup> Imoc keracmangang nga doku seria negeg uba mesufu ayemmekecede amma faka goa ifia. Warac edengunuai nga yaguc monggoc gorongina kpema edengunuduae, ngicngac faka ifia modacandae, yeni Anutuac eucererenggac maridzoming naric mi megecede.

<sup>22</sup> Asuac fora imocngo heresongogoc hoangemema kekec nga ubangerec amma ruae nga modzotitia kpac amma faka yumea nga faka gombunga amma negen negensinggoc kekec,

<sup>23</sup> nga wosoefacgoc kekec amma faka nomana. Dedeseriyoacngo faka ifia sasawa kpae mong mi heiude.

<sup>24</sup> Anu Yesu Kristoac ngicngac yeni uba eseangina imocac hereyacyac nga negensongogoc, imoc mariponnu bic kpegec homeec.

<sup>25</sup> Asungo kekecnina meficgenemmeudeu, yengngoc kekecnina garenggeu nenang ye modachisina.

<sup>26</sup> Modacma sebiengeng me keracmangang angemema mi tobangemebisina.

## 6

<sup>1</sup> Tosofocna, ngenearunac ngic mongngo sing feraheu ngic Asugoc kecdae, ngeneng imoc meficgema ngic ifia uba yumeau edemengere ambisia. Nga ngenang ifingoc faitobannu makpebauac ine garengemema kecbisia.

<sup>2</sup> Ngeni botucnginau ebicngina fuama emekpesi kecbisia. Ifi amma Kristoac dedeseriyoac hafoangoc modacgecede.

<sup>3</sup> Ngic mong ye engena mi amma yengenaac negenu engena ande, ye ine yengenaoc ikoc ange-meude.

<sup>4</sup> Nga ngeni tembuc tembuc angammemengina hengising ambisia. Anu mongngo henu fakaya naric anu, imocac ubangerec yengenaaru febeso. Femiudeu goa yeneac faka hemma imocgoc mi isinggebeso.

<sup>5</sup> Ngic tembuc tembuc yeni ebicngina tembuc tembuc tofohogede.

<sup>6</sup> Kpouk poufocngina Anutuac yoac kpoungem-meandae, ngeni yeneac negensima wiacngina gombunga hendzicma yeneac noboha yemme-bisia.

<sup>7</sup> Anu ngeni ikoc angemebauac henghomema kecbisia. Ge Anutu ikoc ammima naric mi to-banggenade. Ngic mong ye semeng mong home-rude, ye semeng fora siriha ifiangoc kpedziude.

<sup>8</sup> Ngic mong ye uba esea arennu wiac homecande, yeng uba eseaac arennunac foraya kpedziu manganema kpac anude. Nga Asuac arennu wiac homecande, yeng imocac fora, kekeha wisic wisickea kpac kpedziude.

<sup>9</sup> Imocac amma faka gombungaac kucmama mi ambisina. Nenang modzotitia kpac kecma faka gombunga amma kecmima nasoyada hau semeng fora gombunga menide.

<sup>10</sup> Nenang nasonina fedengoc, imohai ngicngac sasawa faka gombunga ayemmekecbisina nga arengfocnina Kebunina negensinggema kecdae, yeni momoc gombunga ayemmebisina.

<sup>11</sup> Henggec, neannaoc marinango kibi kuneng yombong ohongemmeduae.

<sup>12</sup> Ngic sasawa yeni sebi tosingina herecgegedeac igocngunuma dekecdae, yeni uba eseaac siricfu engena anggedeac amma ifi degede. Amma yeni Kristoac mariponggac amma yunukporac ayemmebauac, imocac ifi angemmekecdae.

<sup>13</sup> Ngic sebi tosingina bic herecgegec, yeni yenaoc dedeseriyoac mi tofohokecdaengoc. Yeni ine ngeneac negemma yenaoc kpac kuneng megedeac amma ngeneng sebi tosingina herecgegedeac homac ayemmeude.

<sup>14</sup> Nga neng wiac monggac negemma kpacna mi miacbade, kpac yombong. Kebunina Yesu Kristoac mariponggac amma bangebac wiacngo mariponnu homeec nga neng ifingoc bangebac wiacac homemiaiac negemma dedengerec angkecduae.

<sup>15</sup> Ngic sebi tosa herec herecgea me mi herec herecgea imocngo wiac engena mi ande. Nga Anutungo deu wiac gboria fingerec, imocngo ine wiac engena ande.

<sup>16</sup> Nga ngicngac singyoac imoc kekecnginau modackecdae, yenearu ruae nga wosoefacngo witinginau febeso amma Anutuac Israe yenearu ifingoc.

<sup>17</sup> Amma yofi desiduae, ngic mongngo ni ubae-bic monggoc mi nembeso nocac Yesuac kubehaac ebic sebinau mekecduae

<sup>18</sup> Tosofocna, Kebunina Yesu Kristoac wosoefacngo ngeneac ongaasunginagoc febeso, imoc fora.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

19b7c48c-f4ce-5007-838d-58f01dc01ecc